

UNIVERZITET U SARAJEVU - PRAVNI FAKULTET

Komisija za izbor jednog nastavnika_ice u zvanje redovnog_ne profesora_ice na naučnoj oblasti Finansijsko pravo

Vijeću Univerziteta u Sarajevu — Pravni fakultet

Predmet: Izvještaj s prijedlogom za izbor u akademsko zvanje redovni_a profesor_ica na naučnoj oblasti Finansijsko pravo

a) Podaci o objavljenom konkursu, imenovanju i radu Komisije izbor jednog nastavnika_ice u zvanje redovnog_na profesora_ice na naučnoj oblasti Finansijsko pravo

Na osnovu člana 121. u vezi sa članom 176. Zakona o visokom obrazovanju Kantona Sarajevo („Službene novine Kantona Sarajevo“, broj: 36/22 i 25/28), članova 233. i 234. Statuta Univerziteta u Sarajevu (2023), broj: 01-14-35-1/23 od 26. 7. 2023. godine, Odluke Senata Univerziteta u Sarajevu, br. 01-6-31/26 od 25. 2. 2026. godine, a u skladu sa Odlukom o usvajanju dinamičkog plana potreba Univerziteta u Sarajevu - Pravnog fakulteta za raspisivanjem konkursa za izbor u zvanje u akademskoj 2025/26. godini br. 01-972/25 od 3. 9. 2025. godine, Univerzitet u Sarajevu - Pravni fakultet je raspisao k o n k u r s za izbor u akademsko zvanje nastavnik_ica u zvanje redovni_a profesor_ica na naučnoj oblasti **Finansijsko pravo**, 1 izvršilac, puno radno vrijeme (redni broj 2. Dinamičkog plana potreba za raspisivanje konkursa za izbor u studijskoj 2025/26. godini koji je usvojen Odlukom br. 01-972/25 od 3. 9. 2025. godine).

Konkurs je objavljen 13.03.2026. godine u dnevnom listu „Dnevni Avaz“ i na službenoj internet stranici Pravnog Fakulteta (www.pfsa.unsa.ba), te službenoj internet stranici Univerziteta u Sarajevu (www.unsa.ba).

Nakon isteka roka za prijave na konkurs, na osnovu člana 123. Zakona o visokom obrazovanju Kantona Sarajevo („Službene novine Kantona Sarajevo“, broj: 36/22 i 25/28), i člana 236 Statuta broj: 01-14-35-1/23 od 26.07.2023, Vijeće Univerziteta u Sarajevu - Pravnog fakulteta (dalje: Fakultet) je na 108. vanrednoj (elektronskoj) sjednici održanoj 09.04.2026. godine donijelo Odluku o imenovanju Komisije za pripremanje prijedloga za izbor i utvrđivanje adekvatnosti naučne oblasti za jednog nastavnika_ice u zvanje redovnog_e profesora_ice na naučnoj oblasti Finansijsko pravo, br. 01-550-1/26 od 09.04.2026. godine.

U stavu 1 Odluke o imenovanju Komisije za pripremanje prijedloga za izbor i utvrđivanje adekvatnosti naučne oblasti za jednog nastavnika_ice u zvanje redovnog_e profesora_ice na naučnoj oblasti Finansijsko pravo, br. 01-550-1/26 od 09.04.2026. godine određen je sastav Komisije kako slijedi (dalje: Komisija) :

- 1) Prof. dr. Kanita Imamović-Čizmić, redovna profesorica Univerziteta u Sarajevu - Pravnog fakulteta na naučnoj oblasti pravno-ekonomske nauke, predsjednica Komisije;*
- 2) Prof. dr. Nataša Žunić-Kovačević, redovna profesorica u trajnom zvanju, iz naučnog područja društvene nauke, naučnog polja: pravo, na Katedri za finansijsko pravo na Pravnom Fakultetu Univerziteta u Rijeci, članica Komisije;*
- 3) Prof. dr. Aleksandra Maksimovska, redovna profesorica na Univerzitetu svetog Ćirila i Metodija - Pravni fakultet Justinijan I na naučnoj oblasti finansijsko pravo i finansije, članica Komisije;*

U stavu 2 Odluke o utvrđivanju Komisije za pripremanje prijedloga za izbor i utvrđivanje adekvatnosti naučne oblasti za jednog nastavnika_ice u zvanje redovnog_e profesora_ice na naučnoj oblasti Finansijsko pravo, br. 01-550-1/26 od 09.04.2026. godine, u skladu sa članom 236 st. 4 Statuta, utvrđena je i adekvatnost naučnih oblasti na koju su izabrane prof. dr. Nataša Žunić-Kovačević i prof. dr. Aleksandra Maksimovska,

Temeljem 124 Zakona o visokom obrazovanju Kantona Sarajevo („Službene novine Kantona Sarajevo“, broj: 36/22 i 25/28), čl 236. Statuta (2023) Komisija ima zadatak da u postupku pripremanja prijedloga za izbor u akademsko zvanje redovnog profesora na naučnoj oblasti finansijsko pravo, dostavi pisani Izvještaj s prijedlogom Vijeću Fakulteta u roku od 30 dana od dana imenovanja.

Iz Dekanata Fakulteta je, putem e-maila 14.04.2026., zajedno s odlukama o imenovanju članica Komisije, dostavljena i Potvrda o prijavama na konkurs za izbor jednog nastavnika_ice u zvanje redovni_a profesor_ica na naučnoj oblasti Finansijsko pravo broj 01-529-21/26 od 31.03.2026, u kojoj je, u skladu sa odredbom člana 255 Statuta Univerziteta u Sarajevu, broj: 01 -14-35-1/23 od 26. 07. 2023. godine, Sekretar Univerziteta u Sarajevu - Pravnog fakulteta, potvrdio da se istekom roka za prijavljivanje kandidata na konkurs za izbor nastavnika_ice u zvanje redovni_a profesor_ica na naučnoj oblasti finansijsko pravo, objavljenog u dnevnom listu „Dnevni Avaz” dana 13. 3. 2026. godine i na internet stranicama Pravnog fakulteta Univerziteta u Sarajevu i Univerziteta u Sarajevu, blagovremeno prijavio_la 1 (jedan) kandidat_kinja.

U skladu sa stavom 1 i stavom 2 člana 256 Statuta, Komisija je 23.04.2026. godine održala konstituirajuću sjednicu na kojoj je usvojila Poslovnik o radu br. 01-635-/26 od 23.04.2026. godine te uz prisustvo Sekretara Fakulteta (predstavnik stručne službe Fakulteta) otvorila pristigle prijave. Na raspisani konkurs pristigla je jedna prijava, koju je podnijela dr. Edina Sudžuka, vanredna profesorica na naučnoj oblasti Finansijsko pravo, na Univerzitetu u Sarajevu – Pravnom fakultetu.

Uvidom u prijavu dr. Edine Sudžuka, Komisija i stručna služba Fakulteta je konstatovala da je kandidatkinja, uz svojeručno potpisanu prijavu na konkurs, priložila dokumente kako slijedi:

- biografiju (CV) i spisak objavljenih knjiga, naučnih radova, naučnih dostignuća i doprinosa, projekata patenata ili originalnih metoda iz oblasti za koji se vrši izbor (u elektronskoj i štampanoj varijanti);
- listu objavljenih knjiga, udžbenika i naučnih radova kao i same knjige i radove u originalu ili elektronskoj formi;
- Potvrdu o provedenom najmanje jednom izbornom periodu u zvanju vanredni profesor; (br. 01-483/26 od 24.03.2026.);
- Potvrdu o angažmanu na drugoj visokoškolskoj ustanovi u svojstvu spoljnog saradnika, (br. 05/2-773-1/26 od 04.02.026.);
- Potvrdu o evaulaciji akademskog osoblja izdatu od strane Odbora za osiguranje kvaliteta univerzitet u Sarajevu - Pravnog fakulteta (br. 01-474-11/26. od 19.03.2026.);
- Potvrdu o obavljanju funkcije prodekanice za finansije Univerziteta u Sarajevu - Pravnog fakulteta (br. 01-482/26 od 24.03.2026. godine);

- Potvrdu o mentorstvu na II ciklusu studija izdatom od strane Univerziteta u Sarajevu - Pravnog fakulteta (br. 01-473-1/26 od 23.03.2026. godine);
- Potvrdu o imenovanju za mentora na II ciklusu studija izdatom od strane Pravnog fakulteta Univerziteta u Tuzli (br. 05/3-14-78-2/26 od 03.03.2026. godine);
- Potvrdu o mentorstvu kod izrade i obrane doktorskog rada (III ciklus) izdatom od strane Pravnog fakulteta Sveučilišna u Mostaru (br. 05-127/26 od 02.02.2026.);
- Uvjerenje o državljanstvu ne starije od 6 mjeseci;
- Izvod iz matične knjige rođenih (original ili ovjerena kopija).
- certifikate kao drugu dokumentaciju kojom dokazuje da ispunjavaju minimalne uslove za izbor (Potvrde o učešću : *21st Days of Criminal Justice Sciences, we are delighted to announce the International Scientific Conference CFS 25, titled "Criminalistics, Criminology and Security Studies in the 21st Century", scheduled for October 2 and 3, 2025; Annual International Scientific Conference 2025 "Contemporary Challenges to Legal Systems", organized by te Iustinianus Primus Faculty of Law, Ss. Cyril and Methodius University in Skopje; 10. International Tourism and Hospitality Management Congress (ITHMC), održat će se od 24. do 27. 10. 2024.*).

U skladu sa odredbom člana 256 st. (2) Statuta izdata je Potvrda o potpunosti (urednosti) prijave dr. Edine Sudžuka na konkurs u zvanje redovnog_e profesora_ice na naučnoj oblasti Finansijsko pravo, br. 01-6341/26 od 23.04.2026 godine kojom se konstatira da je podnesena prijava shodno raspisanom konkursu: potpuna i vlastoručno potpisana od strane podnositeljice.

b) Podaci o uvjetima za izbor u akademsko zvanje redovni_na profesor_ica propisanim Zakonom o visokom obrazovanju Kantona Sarajevo („Službene novine Kantona Sarajevo“, broj: 36/22) i analiza ispunjenosti uvjeta od strane prijavljene kandidatkinje

Na osnovu odredbe čl. 176 Zakona o visokom obrazovanju Kantona Sarajevo („Službene novine Kantona Sarajevo“, broj: 36/22 i 25/28), uvjeti za izbor propisani su temeljem čl. 96 Zakona o visokom obrazovanju Kantona Sarajevo („Službene novine Kantona Sarajevo“, broj: 33/17), te Uputama o realizaciji izbora u isto ili više akademsko zvanje na Univerzitetu u Sarajevu u skladu sa uslovima propisanim ranijim Zakonom, broj 01-15-29/23 od 27.09.2023. godine kako slijedi:

1. proveden najmanje jedan izborni period u zvanju vanrednog_e profesora_ice,

2. najmanje osam naučnih radova objavljenih u priznatim publikacijama koje se nalaze u relevantnim naučnim bazama podataka,
3. najmanje dvije objavljene knjige,
4. originalni stručni uspjeh kao što je projekt, patent ili originalni metod,
5. uspješno mentorstvo najmanje po jednog kandidata za stepen drugog odnosno integrisanog ciklusa studija i trećeg ciklusa studija.

b) Postupanje Komisije u svrhu utvrđivanja i ocjene postojanja uvjeta za izbor u akademsko zvanje i podnošenje Izvještaja

U okviru svojih nadležnosti, Komisija je, nakon pregleda pristigle prijave i dostavljenih dokaza, utvrdila njihovu ispravnost te stekla uslove da napravi detaljan uvid u karakter dostavljenih dokaza i pripremi prijedlog za izbor nastavnika_ice u zvanje redovn_a profesor_ica na naučnoj oblasti Finansijsko pravo.

Nakon što je pristupila detaljnom pregledu i analizi prijave, priloženih materijala, dostavljenih radova i ostalih relevantnih dokumenata, u skladu propozicijama Konkursa, Komisija Vijeću Univerziteta u Sarajevu - Pravnog fakulteta podnosi sljedeći:

I Z V J E Š T A J

sa prijedlogom izbora u akademsko zvanja na naučnoj oblasti **Finansijsko pravo**

1. Osnovni biografski podaci

Kandidatkinja dr. Edina Sudžuka rođena je 19.5.1974. godine u Sarajevu gdje je završila osnovnu i Srednju ekonomsku školu „Hasan Brkić“. Na Pravnom fakultetu Univerziteta u Sarajevu diplomirala je 7.5.1997. godine. Postdiplomski studij na Ekonomskom fakultetu u Sarajevu završila uspješnom odbranom magistarskog rada pod naslovom „Porez na dodatnu vrijednost u funkciji porezne reforme s posebnim osvrtom na Bosnu i Hercegovinu“ 4.7.2005. godine. Naučni stepen doktora pravnih nauka iz oblasti Finansijsko pravo stekla je na Pravnom fakultetu Univerziteta u Sarajevu javnom odbranom doktorske disertacije pod naslovom: „Fiskalni i socijalni aspekti primjene poreza na dodatnu vrijednost i poreza na dohodak u

poreznom sistemu Bosne i Hercegovine“ 20.11.2014. godine. U 1998. godini kandidatkinja je izabrana u zvanje asistenta na nastavni predmet Finansije i finansijsko pravo, u 2006. godini u zvanje višeg asistenta na naučnoj oblasti Finansijsko pravo, 2015. godine u nastavno-naučno zvanje docenta, a 2020. godine u naučno zvanje vanredne profesorice na naučnoj oblasti Finansijsko pravo na Pravnom fakultetu Univerziteta u Sarajevu.

2. Proveden najmanje jedan izborni period u zvanju vanrednog_e profesora_ice na naučnoj oblasti finansijsko pravo

Uvidom u sadržaj Potvrde o provedenom najmanje jednom izbornom periodu u zvanju vanredni profesor i Potvrde o evaulaciji akademskog osoblja izdatu od strane Odbora za osiguranje kvaliteta univerzitet u Sarajevu - Pravnog fakulteta može se konstatirati da je kandidatkinja u izbornom periodu u zvanju vanredne profesorice izvodila nastavu na I, II i III ciklusu studija na Univerzitetu u Sarajevu – Pravnom fakultetu i to:

- na I ciklusu studija nastavu :

1) na obaveznim predmetima:

a) na IV godini studija, VII semestar, Međunarodno finansijsko pravo, akademske 2020/2021., 2021/2022. godine;

b) na III godini studija, V semestar, Finansije i finansijsko pravo, svake akademske godine (iz ovog nastavnog predmeta izvođena studentska praksa od 2020-2025. godine).

2) na izbornom predmetu :

a) do akademske 2020/2021. - Monetarno i bankarsko pravo,

b) od akademske 2020/2021. - Porezni obveznik i porezna obaveza, Osnove poreznog prava, Uvod u porezno pravo.

- na II ciklusu studija nastavu :

1) na obaveznom predmetu Porezno pravo i porezni sistem,

2) na izbornom predmetu Budžetsko pravo.

- na III ciklusu studija :

1) kao nositeljica nastavu na obaveznom predmetu smjera Finansijsko pravo – izabrane teme u ljetnjem semestru 2022. i 2025. godine;

2) na kao nositeljica nastavu izbornim predmetima smjera: Pravo međunarodnih finansijskih institucija i Međunarodno porezno pravo 2025. godine u ljetnjem semestru.

Na Univerzitetu u Sarajevu – Pravnom fakultetu, redovno se provodi evaluacija rada nastavnika i saradnika, pri čemu je u razdoblju 2020–2025. godine rad kandidatkinje ocjenjivan prosječnom ocjenom u rasponu od 4 do 5 (gdje je 5 najviša ocjena), što je potvrđeno dostavljenom potvrdom Odbora za osiguranje kvaliteta Pravnog fakulteta. Pored toga, kandidatkinja je ostvarila značajan angažman i izvan matične institucije, te je na Pravnom fakultetu Univerziteta u Tuzli u akademskoj 2020/2021. godini, na trećoj godini prvog ciklusa studija, izvodila nastavu i ispite iz predmeta Finansije i finansijsko pravo, te je učestvovala u izvođenju nastave na drugom ciklusu studija na predmetu Evropsko porezno pravo i porezni sistem, što je potvrđeno odgovarajućom dokumentacijom.

Poseban doprinos kandidatkinje ogleda se u sistematskom povezivanju nastave sa praksom i organizaciji studentske prakse na I ciklusu studija u periodu 2019–2025. godine, kroz iniciranje i razvoj institucionalne saradnje sa relevantnim organima i institucijama, uključujući Pravobranilaštvo Bosne i Hercegovine, tužilaštva, Ministarstvo finansija Federacije Bosne i Hercegovine, Porezna uprava Federacije BiH, Federalni zavod penzijsko-invalidskog osiguranja, Federalna uprava za inspeksijske poslove, Centralna banka Bosne i Hercegovine, Sarajevska berza i različite finansijske institucije, Savez samostalnih sindikata državnih službenika i namještenika Federacije BiH, Agencija za istrage i zaštitu Bosne i Hercegovine, Uprava za indirektno oporezivanje Bosne i Hercegovine. Kandidatkinja je organizirala brojne stručne posjete studenata institucijama s ciljem njihovog upoznavanja sa praktičnom primjenom finansijskog zakonodavstva te izazovima u njenoj implementaciji.

Istovremeno, kandidatkinja je kontinuirano učestvovala u radu stalnih i ad hoc komisija Fakulteta, uključujući Redakcijski odbor Godišnjaka, Komisiju za izdavačku djelatnost, Etički komitet, kao i komisije za upis, priznavanje kvalifikacija i ekvivalenciju ispita.

U periodu od 4. oktobra 2021. do 30. septembra 2025. godine obavljala je funkciju prodekanice za finansije Pravni fakultet Univerziteta u Sarajevu, pri čemu je, pored redovnih poslova, aktivno učestvovala u planiranju razvoja Fakulteta i izradi idejnog projekta izgradnje Kampusa Univerziteta u Sarajevu, uključujući saradnju na izradi Masterplana u kojem je učestvovala međunarodna projektantska kuća ARUP.

Zaključak – Kandidatkinja Dr. Edina Sudžuka ispunjava uvjet vezan za proveden najmanje jedan izborni period u zvanju vanredne profesorice, u smislu člana 96 Zakona o visokom obrazovanju Kantona Sarajevo („Službene novine Kantona Sarajevo“, broj: 33/17), s obzirom da se procedura izbora člana akademskog osoblja u isto ili više zvanje,

prema čl. 121 stav 2 Zakona o visokom obrazovanju Kantona Sarajevo („Službene novine Kantona Sarajevo“, broj: 36/22 i 25/28), u skladu s dinamičkim planom potreba, pokreće najkasnije četiri, odnosno najranije šest mjeseci prije isteka izbornog perioda dotičnog člana akademskog osoblja.

3. Naučno-istraživački i stručni rad kandidatkinje (Objavljene knjige, naučni i stručni radovi)

3.1. Objavljene knjige, naučni i stručni radovi do izbora u zvanje vanredne profesorice

Knjige:

- ✓ Ćorluka Dinko, Kovačević Merima, Puljić Mirko, Senjak Kata, Sudžuka Edina (2005): Komentar Zakona o porezu na dodatnu vrijednost, Sarajevo: Poslovni zbornik, str. 321.
- ✓ Sudžuka Edina: Porezni obveznik i porezna obaveza u zakonodavstvu i sivoj ekonomiji, Pravni fakultet Univerziteta u Sarajevu, Sarajevo, 2020., str. 244., 25 cm; ISBN:978-9958-14-030-3; COBISS.BH-ID 29100806

Naučno-istraživački i stručni radovi

- ✓ Sudžuka Edina: „Public interest, Personal data protection and Bank secrecy: A brief look at the Legal System of Bosnia and Herzegovina and Federation of Bosnia and Herzegovina“, Pregled – Univerzitet u Sarajevu, broj 1, Sarajevo, 2020. Izvorni naučni rad.
- ✓ Sudžuka Edina i Šikalo Vernes: „Elektronska komunikacija u poreznim upravama u Bosni i Hercegovini“, Godišnjak Pravnog fakulteta u Sarajevu, br. LXII, Sarajevo, 2019., str. 495-528. Pregledni naučni rad.
- ✓ Sudžuka Edina “Porez na osobni dohodak s osvrtom na ciljeve i efekte oporezivanja dohotka od nesamostalne djelatnosti u Federaciji Bosne i Hercegovine”, Godišnjak Pravnog fakulteta Univerziteta u Sarajevu, br. LXI, Sarajevo, 2018., str. 97-129. Izvorni naučni rad.
- ✓ Sudžuka Edina: “Direct Tax Reform in the Federation of BiH: Influence of Tax Rates and Tax Expenditures on Tax Competitiveness”, Zbornik radova “The Legal Framework for Economic Competitiveness" - The 6th Bosnian and Herzegovinian, Croatian and Turkish Jurist Day, Faculty of Law, University of Zagreb. 2019. str. 21 - 45. Pregledni naučni rad.

- ✓ Sudžuka Edina "Porezi, carine i korupcija", Godišnjak Pravnog fakulteta Univerziteta u Sarajevu, br. LX, Sarajevo, 2017., str. 387-401. Stručni rad.
- ✓ Sudžuka Edina „Fiskalni aspekti primjene poreza na dodatnu vrijednost u Bosni i Hercegovini“, Godišnjak Pravnog fakulteta Univerziteta u Sarajevu, br. LIX, Sarajevo, 2016., str. 325-362. Pregledni naučni rad.
- ✓ Sudžuka Edina, Nužnost, uvjeti i pouke reformi poreskih sistema zemalja u razvoju“, Godišnjak Pravnog fakulteta Univerziteta u Sarajevu, no: XLVII, Sarajevo, 2004, str. 355-373.
- ✓ Sudžuka Edina, "Pogledi na poresku administraciju zemalja u tranziciji", Ljudska prava, no: 2-4, godina V, Sarajevo, 2004, str. 165-172.
- ✓ Sudžuka Edina, "Fiskalni federalizam s osvrtom na Bosnu i Hercegovinu", Godišnjak Pravnog fakulteta Univerziteta u Sarajevu, no: XLVIII, 2005, str. 459-480.
- ✓ Sudžuka Edina, "Kratki osvrt na razvoj Evropske unije", Ljudska prava, no: 1-2, godina VI, 2005, str. 50-57.
- ✓ Sudžuka Edina, "Reforma poreskih sistema zemalja u procesu ekonomske tranzicije", Ljudska prava, no: 3-4, godina VI, 2005, str. 211-214.
- ✓ Sudžuka Edina, "Porez na dodatnu vrijednost u Bosni i Hercegovini", Godišnjak Pravnog fakulteta Univerziteta u Sarajevu, no: XLIX, Sarajevo, 2006. godine - stručni rad, str. 399-412.
- Sudžuka Edina, "Efikasnost poreske administracije", Ljudska prava, no: 3-4, godina VII, 2006, str. 151-154.
- ✓ Sudžuka Edina, „Pridržavanje principa pravičnosti u provedbi porezne reforme s osvrtom na (ne)pravičnost poreza na dodatnu vrijednost“, Pregled - Univerzitet u Sarajevu, no: 3, Sarajevo, 2006. godine, UDK 336.22+336.226.131, str. 59-82.
- ✓ Sudžuka Edina, „Opće naznake o poreznoj reformi i efektima poreza na dodatnu vrijednost u Bosni i Hercegovini“, Ljudska prava, no: 1-4, godina VIII, 2007, 102-108.
- ✓ Sudžuka Edina, „Stope poreza na dodatnu vrijednost u kontekstu IV Direktive Evropske unije“, Ljudska prava, no:1-4, IX, Sarajevo, 2008, str. 147-156.
- ✓ Sudžuka Edina, „Dopušteno izbjegavanje poreznih obaveza u okvirima zakona“, Godišnjak Pravnog fakulteta Univerziteta u Sarajevu, br. LII, Sarajevo, 2009. godine – prethodno naučno saopćenje, str. 399-415.

- ✓ Sudžuka Edina, „Izvori prihoda vjerskih zajednica u Bosni i Hercegovini“, Godišnjak Pravnog fakulteta Univerziteta u Sarajevu, br. LIII, Sarajevo, 2010. Godine – prethodno naučno saopćenje, str. 409-429.
- ✓ Sudžuka Edina, „Porezna utaja, faktori koji pridonose njenom jačanju, posljedice koje nastaju utajom poreza i mjere za suzbijanje ove pojave“, Godišnjak Pravnog fakulteta Univerziteta u Sarajevu, br. LIV, Sarajevo, 2011. godine – pregledni naučni rad, str. 331-347.
- ✓ Sudžuka Edina, „Porezne reforme: Pouke i preporuke iz iskustva zemalja članica OECD-a i zemalja u razvoju“, Godišnjak Pravnog fakulteta Univerziteta u Sarajevu, br. LV, Sarajevo, 2012. godine - pregledni naučni rad, str. 385-405.

3.2. Objavljene knjige, naučni i stručni radovi od izbora u zvanje vanredne profesorice

a) Nakon izbora u akademsko zvanje vanredne profesorice, kandidatkinja je bila koautor_ica slijedećih knjiga:

- 1. Sudžuka Edina, Maslo Fatima: Porezno procesno pravo– postupak indirektnog oporezivanja, Univerzitet u Sarajevu – Pravni fakultet, Sarajevo, 2026., str. 156.**

Knjiga Pravni okvir sistema indirektnog oporezivanja BiH daje sistematičan prikaz pravnih, institucionalnih i procesnih aspekata indirektnih poreza u Bosni i Hercegovini. U prvom dijelu autorice polaze od općih pitanja poreznog prava, objašnjavaju pravnu prirodu porezne obaveze, osnovne pojmove poreznog i poreznog procesnog prava, te strukturu postupka oporezivanja i njegove ključne učesnike (fiskalnu upravu i porezne obveznike). U knjizi je dat prikaz razvoj i organizacije sistema indirektnog oporezivanja u Bosni i Hercegovini, s posebnim naglaskom na ulogu Uprave za indirektno oporezivanje Bosne i Hercegovine, njenim nadležnostima, upravljanju rizicima i saradnji s drugim institucijama. Također posebna pažnja se posvećuje procesnom aspektu indirektnog oporezivanja: od pokretanja postupka i kontrole (uključujući inspeksijske radnje i donošenje rješenja), preko prinudne naplate poreza i mjera osiguranja duga, do postupaka povrata poreza u različitim situacijama. U knjizi se analiziraju i pravna sredstva zaštite, uključujući žalbeni postupak i upravni spor. Završna poglavlja posvećena su posebnim oblicima indirektnih poreza – akcizama i putarinama,

njihovoj svrsi, načinu obračuna i primjeni u praksi. U cjelini, knjiga pruža integrisan prikaz kako normativnog okvira tako i praktične primjene sistema indirektnog oporezivanja u Bosni i Hercegovini.

2. Edina Sudžuka, Džamna Duman Vranić, Haris Hadžijusufović, Dino Kovadević: Prava djeteta u sistemu javnih politika i budžetskog planiranja u Bosni i Hercegovini, Univerzitet u Sarajevu – Pravni fakultet, Sarajevo, 2026., str. 196.

Autori_ice u knjizi pružaju unikatnu i sveobuhvatnu analizu odnosa između prava djeteta i javnih politika, s posebnim fokusom na budžetske procese u Bosni i Hercegovini. U uvodnom dijelu razrađuju se osnovni koncepti prava djeteta, pri čemu se dijete posmatra kao aktivan subjekt javnih politika, s naglaskom na participaciju, nediskriminaciju i princip najboljeg interesa djeteta. Autori_ica dalje analiziraju kako se ova prava integriraju u proces kreiranja javnih politika – od definiranja problema i izbora rješenja, do implementacije i evaluacije – uz poseban osvrt na sektorske politike (obrazovanje, zdravstvo, socijalna i porezna politika) i institucionalni okvir u Bosni i Hercegovini, uključujući ulogu tijela poput Vijeće za djecu Bosne i Hercegovine, Vijeće za djecu FBiH, Vijeće za djecu RS. Centralni dio knjige posvećen je integraciji prava djeteta u proces budžetiranja oslanjajući se na standarde Komitet za prava djeteta, posebno kroz Opći komentar br. 19, uz član 4 Konvencije o pravima djeteta. U tom kontekstu razmatra se i političko-pravna i finansijskopravna dimenzija budžeta, kao i koncept „budžetiranja za djecu“ (PF4C). U završnom dijelu knjige predstavlja se budžetski ciklus kao ključni instrument realizacije prava djeteta, uključujući faze planiranja, izvršenja i nadzora, te analizira konkretne izazove u Bosni i Hercegovini, poput fragmentiranosti javnih politika, ograničenih fiskalnih kapaciteta i nedostataka postojećeg sistema. U knjizi se posebno ističe značaj institucionalne saradnje, uloge ombudsmana, civilnog društva i međunarodnih organizacija poput UNICEF u unapređenju zaštite prava djeteta.

b) Nakon izbora u akademsko zvanje vanredne profesorice, kandidatkinja je bila autorica /koautor_ica slijedećih naučnih radova

- 1. Sudžuka, Edina i Hadžijusufović, Haris. (2025). Collateral Consequences of Conviction in the Sources of Financial Law of Bosnia and Herzegovina and**

Pravne posljedice krivične osude predstavljaju institut krivičnog prava prema kojem nastupanje određenih pravnih posljedica osude, u vidu ograničenja sticanja prava ili gubitka određenih prava osuđenog lica, nije eksplicitno propisano dispozitivom osuđujuće presude, već je riječ o pravnom dejstvu odredaba drugih zakonskih tekstova. Pritom odredbe materijalnog krivičnog prava uređuju sam institut, okvir za nastupanje i krajnji domašaj instituta. Rad analizira pozitivne pravne izvore finansijskog prava na razini Bosne i Hercegovine i Federacije Bosne i Hercegovine, nastojeći identifikovati, a potom i ispitati usklađenost zakonskih odredaba koje u izvorima finansijskog prava ustanovljavaju pravne posljedice krivične osude, sa odredbama pozitivnog materijalnog krivičnog prava kojim se ustanovljava okvir pravnih posljedica osude kao pravnog instituta. Predmetno istraživanje je identifikovalo šest pravnih izvora finansijskog prava na državnom nivou koji sadrže norme koje ustanovljavaju ograničenja civilnih prava, te petnaest pravnih izvora finansijskog prava na razini Federacije Bosne i Hercegovine. Analizom predmetnih normi finansijskog prava ustanovljeno je da su norme tri zakonska teksta, od ukupno dvadeset i jednog zakonskog teksta koji sadrži ograničenja civilnih prava, u potpunosti usklađene sa materijalnim krivičnim pravom. Kako je uočen veliki broj različitih neusklađenosti normi finansijskog prava sa odredbama materijalnih krivičnih zakona u Bosni i Hercegovini, u radu je izvršeno sistematiziranje identifikovanih usklađenosti, a potom je pružen osvrt na pitanje određenja pravne prirode pravnih posljedica osuda kao pravnog instituta. Autori, iako ne pružaju konačni zaključak o pravnoj prirodi pravnih posljedica osude u okviru izvora finansijskog prava, institutu odriču čistu krivičnu prirodu, pa tako pravnu prirodu instituta pravnih posljedica osude pozicioniraju između civilnopravne prirode i mješovite pravne prirode (civilnopravna i krivičnopravna priroda), čime na teorijskog razini doprinose boljem razumijevanju predmetnog instituta. Nadalje, autori opravdanost odstupanja zakonskih rješenja u izvorima finansijskog prava u odnosu na materijalno krivično pravo, dovode u vezu sa ciljevima regulacije i objektima zaštite finansijskog prava, te na osnovu teleološkog tumačenja zaključuju da je neusklađenost odredbi u nekim slučajevima, iako neusklađena

sa odredbama krivičnog prava, sa stanovišta principa proporcionalnosti u ustavnom sudovanju opravdana, dok u značajnom broju identifikovanih neusklađenosti, se radi o rješenjima za koja je krajnje upitno da li bi prilikom podvrgavanja testu proporcionalnosti rezultirala legitimnim, u javnom interesu i proporcionalnim ograničenjem ljudskih prava.

3. **Sudžuka, Edina i Hadžijusufović, Haris. (2025). Environmentally Related Taxation and Environment Protection Fund of the Federation of Bosnia and Herzegovina: Lessons from Centralized Governing Approach. Conference proceedings (Zbornik radova) of the 9th International Scientific Conference on IT, Tourism, Economics, Management and Agriculture – ITEMA 2025, ISBN 978-86-83134-02-1, ISSN 2683-5568 (Zbornik radova u proceduri objave - dostavljena potvrda izdavača o prihvatanju za objavu rada ITEMA 2025 Conference Proceedings (ISBN 978-86-83134-02-1,ISSN 2683-5568).**

U radu je u skladu sa OECD-ovom metodologijom za konstituisanje poreza vezanih za okoliš, izvršena pravna analiza individualnih osnovica, stopa i destiniranosti fiskalnih prihoda, koji u skladu sa OECD-ovom metodologijom, potpadaju pod kategoriju poreza vezanih za okoliš (porezi, takse, naknade), a čije je prikupljanje u nadležnosti Fonda za zaštitu okoliša Federacije Bosne i Hercegovine kao nezavisne finansijske organizacije osnovane zakonom. Nadalje, u radu je prikazana kvantitativna i kvalitativna struktura poreza vezanih za okoliš (porezi, takse, naknade) iz nadležnosti Fonda za zaštitu okoliša Federacije Bosne i Hercegovine, uloga Fonda u prikupljanju i raspodjeli ovih poreza, a naročito pažnja je posvećena poreznoj tehnici i administrativnim aspektima organizacije Fonda za zaštitu okoliša, s obzirom da je u posljednje vrijeme zabilježen trend širenja nadležnosti Fonda. Riječ je o atipičnim nadležnostima za tijelo koje je zakonom osnovano u svojstvu finansijske organizacije i vanbudžetskog fonda. Kako porezi vezani za okoliš u nadležnosti Fonda za zaštitu okoliša, u najvećoj mjeri potpadaju pod kategoriju poreza na zagađenje, autori zaključuju da analizirane osnovice, stope i destiniranost poreza na zagađenje karakteriše konzistentnije, koherentnije i smislenije dovođenje u vezu sa zaštitom okoliša i principom zagaivač plaća u odnosu na druge kategorije poreza vezanih za okoliš u Bosni i Hercegovini i Federaciji Bosne i Hercegovine, poput energetske i transportnih poreza. Autori, sa stanovišta dogmatskog tumačenja, zauzimaju stav da je širenje nadležnosti Fonda za zaštitu okoliša predstavlja nekonzistentno rješenje koje

zamagljuju inicijalnu ideju o zadacima i ulozi Fonda za zaštitu okoliša FBiH, s obzirom da je Fond osnovan kao finansijska organizacija, a naknadno povjerene nadležnosti iz perspektive upravnog i finansijskog prava u potpunosti izlaze iz uobičajenih zadataka vanbudžetskih fondova, te otežavaju upravni nadzor nad izvršavanjem povjerenih zadataka zbog pravne prirode i nezavisnosti Fonda. Kako Fond za zaštitu okoliša prerasta u kvazi agenciju ili kvazi zavod, autori smatraju da je pro futuro indikativna pravna transformacija Fonda za zaštitu okoliša FBiH. Centralizirani pristup u prikupljanju naknada za zagađivače okoliša, a koje uključuju i naknade za emisiju SO₂ i NO₂ čestica, pokazuje svoje prednosti u uvjetima velikog broja kantona u Federaciji Bosne i Hercegovine, te fragmentiranih nadležnosti, naročito iz perspektive osiguranja efikasnosti i strateškog djelovanja u okviru politike zaštite okoliša i politike energijske efikasnosti. Istovremeno, institucionalni i faktički obrasci utroška sredstava pokazuju odsustvo inkorporiranja procjene efikasnosti u raspolaganju novcem, iako efikasnost predstavlja temeljni princip u trošenju prikupljenih sredstava proklamovan zakonom. Stoga autori drže da je potrebno javno objavljivanje ex ante i ex post studij koje dovode u vezu usvojene programe rada i osiguranje zakonom proklamovanog principa efikasnosti. Autori smatraju da Fond za zaštitu okoliša, kao etablirana finansijska organizacija, u skorijoj budućnosti može imati značajnu ulogu u predstojećem uvođenju poreza na ugljik u Bosni i Hercegovini (i Federaciji Bosne i Hercegovine), odnosno uvođenje nacionalnog sistema trgovine emisijama po uzoru na postojeći sistem u Europskoj uniji.

3. Sudžuka, Edina i Hadžijusufović, Haris. (2025). Financing State Cultural Institutions in Post-Dayton Bosnia and Herzegovina: Culture in the Jaws of non-existing “Consensus”. (Zbornik radova naučne konferencije “The Dayton Agreement at 30: Legal Reflections, Politics of Fragmentation and the Future of Peacebuilding” će u biti objavljen u vidu knjige u izdanju izdavača Routledge u periodu juli-septembar 2026. godine – dostavljena potvrda izdavača o prihvatanju za objavu rada)

Sedam kulturnih institucija Bosne i Hercegovine u periodu nakon potpisivanja Dejtonskog mirovnog sporazuma do danas, nema pravno regulisan status s obzirom da država Bosna i Hercegovina, nije preuzela obaveze u svojstvu osnivača ovih institucija, unatoč pravnoj obavezi u skladu sa odredbama Dejtonskog mirovnog sporazuma. Izostanak preuzimanja pravnih obaveza direktna je posljedica nepostojanja konsenzusa tri konstitutna naroda

na državnom nivou, to jest u Parlamentarnoj skupštini Bosne i Hercegovine. Posljedično, navedenih sedam kulturnih institucija nema zakonom regulisanu organizaciju, upravljanje i finansiranje od Bosne i Hercegovine kao osnivača tih institucija. U uvjetima ustavnog pluraliteta u ustavnom pravu Bosne i Hercegovine, autori polaze od kvalifikacija pojedinih ustava koje Šarčević pruža na temelju analize ustavnog prava Bosne i Hercegovine, te nastoje analizom institucionalnih i faktičkih modela finansiranja sedam kulturnih institucija Bosne i Hercegovine i modela alokacije sredstava za kulturu u postratnom periodu, potvrditi navedene kvalifikacije iz perspektive utjecaja ustavnog mehanizma “konsenzusa” na kulturu i kulturni život u bosanskohercegovačkoj stvarnosti. Autori zaključuju da analiza finansiranja sedam kulturnih institucija potvrđuje Šarčevićeve političko-pravne kvalifikacije ustavnog prava Bosne i Hercegovine, a upravo sudbina navedenih kulturnih institucija prikazuje destruktivnost pojedinih političkih centara u Bosni i Hercegovini, čije djelovanje je direktno omogućeno ustavnim i pravnim mehanizmima koji proizilaze iz Dejtonskog mirovnog sporazuma, a među kojim je i konsenzus. Odsustvo konsenzusa stoga direktno omogućuje destrukciju kulturne historije Bosne i Hercegovine, te kulturnog identiteta koji potvrđuje historijska građa koja se čuva u sedam institucija kulture, a obrasci ponašanja određenih političkih centara indikativno sugerišu da je uništenje kulturnog identita upravo prvoklasni politički cilj tih političkih centara. Postojeće finansiranje sedam kulturnih institucija, čiji teret u najvećoj mjeri snose budžeti Kantona Sarajevo i Federacije Bosne i Hercegovine, pokazuje kako se nečinjenje i pasivnost dvaju konstituentnih naroda na državnoj razini negativno održavaju na postojeće modele finansiranja kulture. Nadalje, autori su, analizirajući posljednji relevantni program utroška kojim se alociraju javna sredstva za finansiranje kulture u Federaciji Bosne i Hercegovine, identifikovali etnički kriterij kao osnovni i početni kriterij u dodjeli sredstava putem javnih poziva. Posljedično, Šarčevićeve kvalifikacije ustavnog prava su, na temelju nalaza autora potvrđene, pa autori zaključuju da ustavno pravo Bosne i Hercegovine, preciznije Dejtonski mirovni sporazum, u stvarnosti društvenih odnosa u sferi kulture, praktično omogućuju razgradnju nacionalnog kulturnog identiteta kroz propuštanje finansiranja državnih institucija kulture, s jedne strane, odnosno osujećuju adekvatan ekonomski i kulturni razvoj Bosne i Hercegovine, s obzirom da modeli raspodjele javnog novca u oblasti kulture uspostavljaju dominantan etnički kriterij u raspodjeli, a što se negativno održava na kvalitet izabranih projekata i razvoj kulture i kulturnog života uopće.

4. Sudžuka, Edina i Hadžijusufović, Haris. (2025). Fiscal Implications of National Emissions Trading System (ETS) and Decarbonization in Bosnia and Herzegovina. Economic Review: Journal for Economics and Business – University of Tuzla, ISSN (Print) 1512-8962, ISSN (Online) 2303-680X, Faculty of Economics (dostavljena potvrda izdavača o prihvatanju za objavu rada).

Europski sistem trgovine emisije je uspješno smanjio štetne emisije unutar granica Europske unije, ali je istovremeno utjecao na tzv. “curenje ugljika” (carbon leakage) koje se ogleda u dislociranju emisio intenzivnih industrija izvan granica Europske unije. Početak primjene Mehanizma za prekogranično prilagođavanje ugljika (CBAM) je stoga nametnuo trgovinskim partnerima Europske unije, među kojim je i Bosna i Hercegovina, poticaje za uvođenje vlastitih sistema trgovine emisija kako bi izbjegli pad privredne aktivnosti i plaćanje ugljičnih carina u okviru CBAM mehanizma. U prvom dijelu rada, autori pružaju prikaz pravnih faktora u vidu međunarodnih obaveza koji Bosnu i Hercegovinu obavezuju u sferi europskog Acquis-a, a tiču se energetske zajednice. Nadalje, u prvom dijelu rada se obrazlažu ključni aspekti CBAM-a. U drugom dijelu rada, autori koristeći dostupne ekonomske podatke, u prvom redu podatke o energetske miks, izvozu i ovisnosti o uglju, upotrebom ekonomske analize prava ispituju ekonomski poticaj za uvođenje vlastitog nacionalnog sistema trgovine emisija. Dobijeni rezultati se, napokon, u trećem dijelu rada dovode u kontekst sa Nacionalnim energetske i klimatske planom do 2030. Godine (NECP) Bosne i Hercegovine, te se temeljem dostupnih procjena o cijeni uglja, analiziraju fiskalni učinci dekarbonizacije i uvođenja nacionalnog sistema emisije trgovinama. Autori zaključuju da uslijed procjene troškova pune implementacije NECP-a, rapidna dekarbonizacija potencijalno ugrožava fiskalnu stabilnost uslijed brojnih ekonomskih i socijalnih posljedica, i to kako na konsolidovanoj osnovi na razini Bosne i Hercegovine, tako i na horizontalnoj osnovi u entitetima i kantonima u FBiH, s obzirom na nejednaku geografsku zastupljenost pogodnih industrija. Ugalj je i dalje osnova za proizvodnju električne energije u BiH, a dekarbonizacija označava kraj vještačko niske cijene električne energije, pa proizvedena električna energija, kao najvažniji izvozni proizvod BiH, postaje uslijed CBAM mehanizama, manje atraktivna za uvoz CEFTA državama. Posljedično, NECP i dekarbonizacija u BiH, nose potencijalne udare na pojedine fiskalne prihode, koje autori

individualno na teorijskoj razini analiziraju u skladu sa dobijenim rezultatima ekonomske analize prava iz drugog dijela rada. Istovremeno, raste potreba za većim izdvajanjem fiskalnih prihoda na ime provođenja i implementacije NECP-a, pa održavanje fiskalne stabilnosti u uvjetima velikih javnih investicija u energetske infrastrukturne projekte, velikih izdataka u vidu subvencija privredi u cilju očuvanja konkurentnosti, te zbrinjavanja viška radnika i socijalnih transfera ugroženim kategorijama stanovništva usljed rasta cijena uzrokovanog rastom cijene električne energije, stvara značajne izazove pred nosiocima javnih politika u BiH. Autori kroz poređenje troškova NECP-a, sa konsolidovanim javnim rashodima na razini Bosne i Hercegovine u proteklm godinama, prikazuju razinu ugroženosti fiskalne stabilnosti u nadolazećem periodu ukoliko se NECP dosljedno implementira, ukazujući na potencijalne izvore dodatnih sredstava u međunarodnim fondovima i potencijalno zaduženje, odnosno povećanje javnog duga Bosne i Hercegovine. Autori su identifikovali ključne smjerove daljnjih istraživanja, te u vidu preporuka za nosice javnih politika, ponudili set praktičnih mjera koje trebaju doprinijeti fiskalnoj koordinaciji i pravnoj implementaciji nacionalnog sistema trgovine emisijama u uvjetima ustavnog pluralizma i fragmentiranih, odnosno, nepodudarnih nadležnosti različitih razina vlasti u sferi pravnih obaveza Bosne i Hercegovine, ali i vođenja fiskalne, energetske, klimatske i politike zaštite okoliša.

5. Sudžuka, Edina i Hadžijusufović, Haris. (2025). Kapacitiranost porezne administracije u otkrivanju porezne evazije u FBiH. Pravna misao, ISSN 0555-0092 (dostavljena potvrda izdavača o prihvatanju za objavu rada).

Fenomen porezne evazije, usljed brojnosti i kompleksnosti faktora koji determiniraju poreznu evaziju, omogućava različite pristupe u istraživanju. Autori u radu pribjegavaju metodama i alatima ekonomske analize prava, pa se osloncem na klasični model odvrćanja od porezne evazije, koji su izradili Allingham & Sandmo, ispituje kapacitiranost porezne administracije u otkrivanju porezne evazije u Federaciji Bosne i Hercegovine. Kroz analizu dostupnih statističkih podataka, autori nastoje utvrditi vezu između mogućnosti otkrivanja učinioaca krivičnih djela porezne utaje, shodno ljudskim i informatičkim kapacitetima porezne administracije i broju provedenih istraga, te racionalnog stava poreznih obveznika u pogledu poticaja koji (ne)kapacitiranost stvara u pogledu potencijalnog učinjenja krivičnih djela iz oblasti poreza.

Autori zaključuju da teorija racionalnog odabira, kao alat ekonomske analize prava, pokazuje značajan prostor za unapređenje kapaciteta porezne administracije u FBiH, s ciljem stvaranja efekta odvraćanja potencijalnih učinitelja krivičnih djela. Identifikovane oblasti i ključni aspekti kapacitiranosti porezne administracije, kao i apsolutni broj provedenih istraga i broj sačinjenih krivičnih izvještaja, neumoljivo pokazuju da je potrebno osigurati veća sredstva za rad porezne administracije, naročito s obzirom da je u proteklom periodu, zabilježena gotovo stalna tendencija rasta efikasnosti organa porezne administracije. Istovremeno, autori ukazuju da je nužno provesti dodatne studije s ciljem utvrđivanja optimalne razine porezne evazije, a što bi doprinijelo jasnijem razumijevanju budžetskih potreba porezne administracije s ciljem jačanja kapacitiranosti. Nadalje, autori iskazuju potrebu za noveliranjem određenih zakona koji će poreznoj administraciji omogućiti efikasnost, prohodnost i brže prikupljanje podataka od relevantnih tijela i institucija, uključujući organizacije platnog prometa. Napokon, autori su identifikovali i ključne interne faktore čije adresiranje može poboljšati rad porezne administracije i omogućiti postizanje većeg efekta u odvraćanju potencijalnih učinitelja krivičnih djela iz oblasti poreza, a radi se o postojanju nelogičnosti u sistematiziranju radnih mjesta u poreznoj administraciji, te odstupanju u rezultatima i efikasnosti pojedinih kantonalnih poreznih ureda na horizontalnoj ravni.

6. Sudžuka, Edina i Hadžijusufović, Haris. (2025). Structure, Volume and Earmarking of Environmental Taxes in the Federation of Bosnia and Herzegovina. Conference proceedings (Zbornik radova) of the 11th International Scientific Conference – „Knowledge based Sustainable Development – ERAZ“ 2025, ISSN 2683-5568, ISBN 978-86-80194-99-8, (dostavljena potvrda organizatora konferencije /izdavača o prihvatanju za objavu rada).

U Bosni i Hercegovini i dalje nije uspostavljen pravni i institucionalni okvir za adekvatno vođenje nacionalnog računa za poreze vezane za okoliš. Određene statistike o prihodima poreza vezanih za okoliš na razini Bosne i Hercegovine postoje, te iste pokazuju značajno viši procenat poreznih prihoda u ukupnoj strukturi poreznih prihoda, a u odnosu na europski prosjek. Istovremeno, na razini entiteta nema javno dostupnih podataka o vođenju računa poreza vezanih za okoliš u skladu sa OECD-ovom metodologijom u domenu poreza vezanih za okoliš. Autori u radu pružaju sveicrpan i sistematičan prikaz

svih fiskalnih prihoda koji imaju karakter poreza vezanih za okoliš u skladu sa OECD-ovom metodologijom, te iste sistematiziraju u četiri kategorije, istovremeno analizirajući kvantitativni značaj pojedinih poreza vezanih za okoliš, ali i porezne osnovice i destiniranost ovih poreza.

Autori na temelju pravne analize zaključuju da značajan udio poreza vezanih za okoliš, ne ispunjava u punom domaćaju zahtjev zagađivač plaća. Drugi ključni problem koji autori identifikuju tiče se destiniranosti pojedinih poreza vezanih za okoliš, gdje neki od najizadšnijih prihoda u kategoriji poreza vezanih za okoliš, imaju malu ili nikakvu poveznicu sa politikom zaštite okoliša, bilo zbog neafektacije ovih prihoda, bilo zbog ilogičnosti u formiranju individualnih osnovica i stopa. Na koncu, treći ključni problem, tiče se fragmentiranih nadležnosti, pa je izrazito teško na makro razini koordinirati brojne nosioce javnih politika kako bi se uspostavio sistematičniji i koherentniji sistem ustanovljavanja pojedinih poreza, taksi i naknada, odnosno kako bi se konkretne osnovice i stope u većoj mjeri uskladile sa poreznom teorijom u domenu ekoloških poreza, i praksom vodećih članica OECD-a. Autori zaključuju, da uprkos visokom udjelu poreza vezanih za okoliš u ukupnoj strukturi poreznih prihoda na konsolidovanoj razini u Bosni i Hercegovini, koja ima tendenciju rasta s obzirom na izvjesno uvođenje ugljičnih poreza u skorijoj budućnosti, ovi porezi, iako imaju odvrćajuću ulogu u zagađenju okoliša, ne uspijevaju u dva ključna cilja koja na kojim insistira nauka o porezima: zaštiti okoliša i internalizaciji štetnih eksternalija.

7. Sudžuka, Edina i Hadžijusufović, Haris. (2025). Economic Analysis of Tax Evasion: Deterioration and System of Criminal Sanctions in Bosnia and Herzegovina and Federation of Bosnia and Herzegovina. Conference proceedings (Zbornik radova) of the Annual International Scientific Conference 2025 "Contemporary Challenges to Legal Systems", organized by the Justinianus Primus Faculty of Law, Ss. Cyril and Methodius University in Skopje.

<https://journals.ukim.mk/index.php/iplr/article/view/4441>

Autori u radu analiziraju aktuelnu sudsku praksu u kontekstu izricanih osuđujućih presuda učiniteljima krivičnih djela iz oblasti poreza, te izrečene krivične sankcije u individualnim predmetima. Ukupno je analizirano 327 pravosnažnih osuđujućih presuda Suda Bosne i Hercegovine, te 43 pravosnažne osuđujuće presude sudova u Federaciji Bosne i Hercegovine. Dobijeni empirijski rezultati pokazuju da apsolutna većina osuđenih

učinitelja krivičnih djela iz oblasti poreza u praksi, bilo zbog izricanja uslovnih osuda na kaznu zatvora, bilo zbog primjene insituta zamjene kazne zatvora novčanom kaznom, uspješno izbjegne služenje kazne zatvora. U pravilu, kod učinitelja krivičnih djela koji nisu izbjegli odsluženje kazne zatvora, posrijedi neki od kvalifikovanih oblika porezne utaje ili sticaj krivičnih djela.

Autori navode i treći problem, koji se negativno održava na odvrćanje potencijalnih učinitelja krivičnih djela, a vezan je za odsustvo konfiskacije nezakonito pribavljene imovinske koristi učinjenjem krivičnih djela. Naposljetku, autori zaključuju da je potrebno revidiranje kaznene politike sudova u praksu, uključujući pribjegavanje izricanju uslovnih osuda, s obzirom da rezultati istraživanja pokazuju negiranje objekta zaštite kod krivičnih djela iz oblasti poreza, pa se stiče utisak o nerazumijevanju fiskalne dimenzije problema u očima sudova koji izriču krivične sankcije učiniteljima navedenih krivičnih djela. Alternativno, uvođenje progresivnih novčanih sankcija bi moglo potencijalno doprinijeti odvrćanju učinitelja krivičnih djela porezne utaje i drugih krivičnih djela iz oblasti poreza u Bosni i Hercegovini.

8. Sudžuka Edina, Hadžijusufović Haris (2024): Financing tangible cultural heritage preservation: An analysis of resource allocation models with overview of expenditures for tangible cultural heritage in Sarajevo Canton 2020-2024, Journal of Tourism and Hospitality Management, 2024, Year 10/Vol.10, p. 113-140. Izvorni naučni rad (potvrda o klasifikaciji rada dostavljena uz rad) https://www.ithmc.com/sites/default/files/u308/ithm_vol_10_final_2024.pdf

Zbog složene ustavne i institucionalne strukture Bosne i Hercegovine, nadležnosti u oblasti kulture su izrazito decentralizirane: u Federaciji BiH one su raspoređene na deset kantonalnih nivoa, u Republici Srpskoj regulirane su na entitetskom nivou, dok je u Brčko Distriktu BiH uspostavljen zaseban sistem upravljanja. Dodatno, principi lokalne samouprave dodatno usložnjavaju sistem i otežavaju analizu javnih rashoda za zaštitu kulturno-historijskog naslijeđa. U kontekstu strateškog planiranja, istaknuti su dokumenti poput Strategije razvoja Federacije BiH 2021–2027. i Strategije razvoja turizma FBiH 2022–2027, kao i strateški dokumenti na nivou Kantona Sarajevo, uključujući Strategiju razvoja turizma do 2030. godine te nacrt Strategije razvoja kulture 2021–2027. godine. Iako postoje ovi strateški okviri, u praksi se uočava nedovoljna koordinacija kulturnih politika u Federaciji BiH, kao i nedovoljno razvijena svijest o prioritetima u raspodjeli

javnih sredstava radi ostvarivanja strateških ciljeva u oblasti kulture. Poseban problem predstavlja nepostojanje jasno definiranih kriterija i sistematizacije kulturnih oblasti prilikom odabira projekata za finansiranje. Autori ističu da šira i raznovrsnija kulturna ponuda direktno doprinosi povećanju turističke atraktivnosti destinacije, što dovodi do većeg broja posjeta, veće potrošnje turista, rasta prihoda i povećanja javnih prihoda. Zaključuje se da bi bolja sinergija politika u oblastima kulture i turizma omogućila ravnomjerniju i efikasniju raspodjelu javnih sredstava te realnije ostvarivanje strateških ciljeva razvoja.

9. Sudžuka Edina, Pašić Azur (2024): Legal and Financial Challenges of „Brain-drain“ in Healthcare in Bosnia and Herzegovina, Leadership, Innovation, Management and Economics: Integrated Politics of Research 2024 LIMEN Conference Proceedings, str. 595-605. Pregledni rad https://limen-conference.com/wp-content/uploads/2026/01/LIMEN_2024-Proceedings-WEB.pdf

Autori analiziraju problem odlaska zdravstvenih radnika, posebno medicinskih tehničara i medicinskih sestara, iz Bosne i Hercegovine i drugih zemalja bivše Jugoslavije, koji predstavlja jedan od ključnih izazova za održivost zdravstvenih sistema. Ističe se da su nakon raspada socijalističkog sistema javne zdravstvene ustanove, koje su ranije bile oslonjene na snažan obrazovni sistem i stabilno kadrovsko popunjavanje, suočene s uvođenjem tržišne ekonomije i sve izraženijom konkurencijom privatnog sektora, što je rezultiralo značajnim odlivom stručnog kadra. Dodatno, sloboda kretanja ljudi i radne snage, naročito unutar Evropske unije i na globalnom nivou, intenzivira migracijske tokove zdravstvenih radnika, što doprinosi nejednako dostupnosti zdravstvenih usluga kako unutar država, tako i među njima. Ovi procesi istovremeno jačaju konkurenciju u zdravstvenom sektoru, što može dovesti do kompromitovanja kvaliteta zdravstvene zaštite, često na štetu pacijenata. Rad se, također, fokusira na identifikaciju i razmatranje mogućih mjera za zadržavanje medicinskog osoblja, pri čemu se naglašava potreba integracije politika zapošljavanja, fiskalnih politika i javnozdravstvenih politika, kao i značaj međunarodne saradnje i sporazuma u rješavanju ovog kompleksnog problema.

10. Edina Sudžuka, Klančević Anel (2025); Pravo na povrat poreza s osvrtnom na mehanizme i modalitete povrata poreza na osobni dohodak u Federaciji Bosne i Hercegovine, Zbornik radova Pravnog fakulteta u Tuzli, god. XI, br. 2, 2025 str. 11-38. Izvorni naučni rad http://pf.untz.ba/?page_id=3402

U radu se objašnjava institut poreza na dohodak kao subjektivnog poreza koji ima važnu ulogu u ostvarivanju socijalnih ciljeva, pravednije raspodjele poreznog tereta i smanjenja regresivnih efekata poreznog sistema. Posebno se naglašava da rezidentni porezni obveznici u Federaciji BiH, na osnovu Zakona o porezu na dohodak Federacije BiH i pratećeg podzakonskog okvira, imaju pravo na povrat više uplaćenog poreza na dohodak za prethodnu godinu, pod uslovima propisanim važećim propisima. Ostvarivanje ovog prava vezano je za obavezu podnošenja godišnje porezne prijave na Obrascu GPD-1051 nadležnoj poreznoj ispostavi prema mjestu prebivališta, najkasnije do 31. marta tekuće godine za prethodnu godinu, uz odgovarajuću prateću dokumentaciju. Postupak povrata obuhvata cijeli administrativni tok – od podnošenja prijave, preko postupanja porezne administracije, do konačne isplate više uplaćenog poreza, koju vrši nadležno kantonalno ministarstvo finansija kao korisnik javnih prihoda. Autori dodatno pojašnjavaju najčešće dileme poreznih obveznika u pogledu uslova i situacija u kojima se pravo na povrat može ostvariti, te detaljno opisuju proceduru kako bi se povećala pravna sigurnost i razumijevanje ovog instituta. U završnom dijelu, kroz analizu podataka Porezne uprave Federacije BiH za period 2017–2023. godine, prikazani su trendovi u ostvarivanju prava na povrat poreza na dohodak i ukupni iznosi izvršenih povrata u Federaciji BiH.

11. Sudžuka, Edina i Šikalo, Vernes.(2025). Prinudna naplata direktnih poreza u Federaciji Bosne i Hercegovine. Godišnjak Pravnog fakulteta u Sarajevu, br. LXVIII., str. 221-256.

U radu „Prinudna naplata direktnih poreza u Federaciji Bosne i Hercegovine „ autori su se bavili analizom sistema direktnih poreza u Bosni i Hercegovini, pri čemu ističu da su uvođenje, primjena, kontrola i naplata ovih poreza u nadležnosti entiteta i Brčko Distrikta. U kontekstu Federacije BiH, autori su se posebno fokusirali na postupak oporezivanja koji je uređen odredbama Zakona o Poreznoj upravi Federacije BiH, kojim se normativno definiše djelovanje porezne administracije. Poseban fokus je bio na naplati poreznih prihoda kao jednom od ključnih funkcija porezne administracije, naglašavajući da se na taj način obezbjeđuju sredstva za finansiranje javnih rashoda, ostvarivanje javnih potreba te pružanje javnih dobara i usluga. U tom smislu, obim naplaćenih poreznih prihoda autori posmatraju kao indikator efikasnosti poreznog sistema i uspješnosti porezne politike u ostvarivanju fiskalnih ciljeva, uključujući preraspodjelu ekonomske snage poreskih

obveznika u korist budžeta različitih nivoa vlasti. Također, u radu je apastorfirana transformacijom uloge porezne administracije u savremenim uslovima, naglašavajući da Porezna uprava Federacije Bosne i Hercegovine sve više djeluje u skladu s principima savremene javne uprave, orijentisane ka korisnicima, te koristi različite oblike komunikacije s poreznim obveznicima radi podsticanja dobrovoljnog ispunjenja poreznih obaveza.

Zaključak – U smislu člana 96. Zakona o visokom obrazovanju Kantona Sarajevo („Službene novine Kantona Sarajevo“, broj: 33/17), kao i člana 198. Statuta Univerziteta u Sarajevu iz 2018. godine, koji definiše kategorije vezane za uvjete za izbor u akademska zvanja, Komisija je cijenila ispunjenost propisanih kriterija u pogledu naučnoistraživačkog rada. Kandidatkinja objavila ukupno šest naučnih radova a za dodatnih pet radova dostavljene odgovarajuće potvrde o njihovom prihvatanju, odnosno da se nalaze u postupku objavljivanja. Komisija posebno naglašava da je kandidatkinja napisala naučne radove u obimu koji prelazi zakonom propisani minimum, ali da oni, uslijed okolnosti tehničke ili proceduralne prirode, do vremenskog trenutka prijave na konkurs, nisu formalno bili objavljeni. Shodno navedenom, Komisija je zauzela stanovište da kandidatkinja, imajući u vidu cjelokupni naučni rad i relevantnu dokumentaciju o statusu radova u procesu objavljivanja, ispunjava propisani uvjet od najmanje osam naučnih radova u smislu važećih zakonskih i podzakonskih odredbi.

4. Originalni stručni uspjeh kao što je projekt, patent ili originalni metod

Kandidatkinja je učestvovala u mnogobrojnim naučno-istraživačkim projektima od kojih se nakon izbora u zvanje vanredne profesorice posebno mogu istaći:

- Projekat finansijske pismenosti mladih koji je kandidatkinja vodila realiziran u tri faze, od kojih su dvije 2020-2021. Druga projektna faza obuhvatila je aktivnosti edukacije i radionicu: Porezni sistem Federacije BiH – izgradnja porezne svijesti u funkciji borbe protiv sive ekonomije; projekt je realiziran posredstvom Ferijalnog saveza BiH, za mlade, volontere i članove. U trećoj faza kandidatkinja je vršila upoznavanje mladih a poreznim sistemom BiH/F BiH, te održala predavanja i radionice s ciljem izgradnje porezne kulture mladih i podizanja

svijesti o porezima, važnosti plaćanja poreza i potrebi kontinuirane borbe protiv finansijskih prevara, sive ekonomije i utaje. (Potvrda br. 02-31/21. od 19.04.2021)

- Nositeljica je i učesnica projekta, zajedno sa grupom istraživača, u projektu „Finansijski pismeni – odgovorni mladi: Od znanja do sigurnije budućnosti“. Projekt iz oblasti nauke od značaja za Federaciju Bosne i Hercegovine, u saradnji sa Udruženjem za saradnju i razvoj Sara iz Mostara, finansiran iz budžeta Federacije BiH za 2025. godinu. https://fmon.gov.ba/Upload/Ostalo/c405540a-fd13-40d3-8849-25053f1522de_Podr%C5%A1ka%20i%20pokroviteljstva%20Finalni%20rezultat%2016102025.pdf (26.04.2026.)

- Projekt Osnove porezne pismenosti, na temelju Memoranduma o saradnji Univerziteta u Sarajevu – Pravnog fakulteta i Porezne uprave Federacije BiH, kandidatkinja je zajedno sa šeficom odsjeka za edukaciju PUFBiH realizovala u martu 2026., kao radionicu i prezentacije održana u prostorijama Središnjeg ureda Porezne uprave FBiH što je prvi od tri planirana projekta u kalendarskoj 2026. godini, edukativne radionice za mlade u kojim su učestvovali članovi Asocijacije srednjoškolaca BiH u Sarajevu. (Federalno ministarstvo finansija, Porezna uprava Federacije BiH, Broj: 13/18-30-25-181- 3-1/26. 2026. od 23.03.2026. Prilog: Okvirni godišnji plan projekata u saradnji s PU FBiH, potvrda Asocijacije srednjoškolaca u BiH, projektni plan, spisak učesnika)

Zaključak – Kandidatkinja ispunjava uvjet vezan za originalni stručni uspjeh kao što je učešće u projektu u smislu člana 96 Zakona o visokom obrazovanju Kantona Sarajevo („Službene novine Kantona Sarajevo“, broj: 33/17).

5. Uspješno mentorstvo najmanje po jednog kandidata za stepen drugog odnosno integrisanog ciklusa studija i trećeg ciklusa studija.

U periodu do izbora u zvanje vanredne profesorice, kandidatkinja je uspješno ostvarila mentorstvo 11 kandidata na II ciklusu na Pravno-ekonomskom smjeru. Nakon izbora u zvanje vanredne profesorice Kandidatkinja je uspješno ostvarila četrdeset devet (49) mentorstava pri izradi i odbrani završnog rada na II ciklusu studija na Univerzitetu u Sarajevu – Pravnom fakultetu, na Katedri pravno-ekonomskih nauka – pravno-ekonomski smjer. Kandidatkinja je

imenovana mentoricom jednog kandidata na II ciklusu studija na Pravnom fakultetu Univerziteta u Tuzli. Na Sveučilištu u Mostaru, Pravnom fakultetu kandidatkinja je ostvarila uspješno mentorstvo na III ciklusu studija tj. imenovana za mentoricu pri izradi i odbrani doktorske disertacije pod naslovom: „*Pravno-ekonomski aspekti upravljanja prodajom u digitalnom okruženju*“ doktoranda mr. sc. Nike Sadrića, na Poslijediplomskom doktorskom studiju iz pravnih znanosti (III. ciklus) na Pravnom fakultetu Sveučilišta u Mostaru. Kandidatkinja je periodu od juna 2020. godine imenovana mentoricom/komentoricom u dvije (2) komisije za ocjenu i odbranu projekta, radne verzije i doktorske disertacije kandidatkinja na III ciklusu studija na Univerzitetu u Sarajevu – Pravnom fakultetu, na Katedri pravno-ekonomskih nauka.

Zaključak - Kandidatkinja ispunjava uvjet vezan za uspješno mentorstvo najmanje jednog kandidata na II ciklusu studija i jednog kandidata na III ciklusu studija .

6. Ostali akademski angažman, učešća na konferencijama, studijski boravci

Uvidom u dostavljenu biografiju internacionalna akademska aktivnost kandidatkinje obuhvata kontinuirano učešće na studijskim boravcima, međunarodnim konferencijama, stručnim seminarima, radionicama i programima usavršavanja u zemlji i inostranstvu, kako prije, tako i nakon izbora u akademsko zvanje vanredne profesorice.

6.1. Studijski boravci u inostranstvu, međunarodne konferencije i stručno usavršavanje u zemlji i inostranstvu prije izbora u zvanje redovne profesorice

- 1) Oktobar/Novembar 2013 - Trening za akademsko i neakademsko osoblje za rad sa studentima s posebnim potrebama: „*Jednake mogućnosti za studente sa specijalnim potrebama u visokom obrazovanju*“, Univerzitet u Sarajevu
- 2) Maj 2013. - XIV Međunarodni simpozij pod nazivom: „Zaokret ka inovativnoj i kreativnoj BiH“, Revicon d.o.o. Sarajevo, Neum, BiH
- 3) Maj 2012. - XIII Međunarodni simpozij pod nazivom: „Fiskalni okvir i održivi razvoj BiH“, Revicon d.o.o. Sarajevo, Neum, BiH
- 4) April 2011. - Reforma visokog obrazovanja „Budući pravci reforme visokog obrazovanja u skladu s Bolonjskim principima“, Sarajevo, BiH
- 5) Novembar 2010. - Sastanak pravnih fakulteta za ustanovljenje Mreže pravnih fakulteta Jugoistočne Evrope SEELS – Pravni fakultet Univerziteta u Splitu, Hrvatska

- 6) April 2010. - Reforma visokog obrazovanja u Bosni i Hercegovini „Razvoj sistema osiguranja kvaliteta u visokom obrazovanju“, Sarajevo, BiH
- 7) Septembar 2009.- XII Međunarodni simpozij pod nazivom „Finansijska i računovodstvena profesija u funkciji prevazilaženja ekonomske krize“, Feb d.o.o. Sarajevo, Neum, BiH
- 8) Mart 2009.- Obrazovni seminar „Pedagoško obrazovanje nastavnika i saradnika“ – Univerzitet u Sarajevu, Bosna i Hercegovina (položen ispit - Certifikat)
- 9) Februar 23., 2006.- Seminar: “Primjena Zakona o porezu na dodatnu vrijednost Bosne i Hercegovine, - obračun, naplata i povrat PDV-a”, (predavač), Poslovni zbornik Sarajevo.
- 10) Decembar 22., 2005. - Seminar: “Pripreme za uvođenje poreza na dodatnu vrijednost u BiH”, (predavač), Poslovni zbornik Sarajevo.
- 11) April 2005- Okrugli stol: „Iniciranje ECTS evaluacije na Univerzitetu u Sarajevu“ Bjelašnica, BiH
- 12) Maj/juni 1998.- Seminar Javne uprave – *Predsjednik Federacije Bosne i Hercegovine i Ministarstvo obrazovanja, nauke i informiranja Kantona Sarajevo*, Sarajevo, Bosna i Hercegovina
- 13) Juli 1998. i 1997. - Ljetna škola prava – *Centar za ljudska prava Sarajevo i Univerzitet u Tuzli*
- 14) Međunarodna sedmica podizanja svijesti o prevarama (Deloitte, 2019), gdje je izlagala rad o prevarama u finansijskopравnim i poreznim odnosima;
- 15) Trilateralna konferencija pravnika u Istanbulu (2018), sa radom o poreznoj i bankarskoj tajni u BiH;
- 16) Međunarodno savjetovanje na Univerzitet u Sarajevu – Pravni fakultet Univerziteta u Sarajevu (2017), sa radom o porezima, carinama i korupciji;
- 17) Konferencija u Zagrebu o pravnom okviru ekonomske konkurentnosti (2017), sa radom o reformi direktnih poreza u Federaciji BiH;
- 18) Angažman u okviru Centar za edukaciju sudija i tužilaca Federacije BiH kao edukator na seminarima iz oblasti poreza, carina i krivičnih djela u poreskom sistemu (2015–2016).

6.2. Studijski boravci u inostranstvu, međunarodne konferencije i stručno usavršavanje u zemlji i inostranstvu nakon izbora u zvanje vanredne profesorice

Nakon izbora u zvanje vanredne profesorice, kandidatkinja internacionalizira svoje aktivnosti kroz :

- 19) međunarodne radionice i istraživačke boravke na Univerzitetu Palacky u Olomoucu (2021) i Univerzitetu u Kadizu (2022);
- 20) učešće na OECD Global Anti-Corruption and Integrity Forumu u Parizu (2024, 2025), kao i pratećim stručnim sesijama Transparency International i OECD;

- 21) učešće na 9. International Conference on Taxpayer Rights u Antwerpenu (2024);
22) učešće na EU Tax Observatory forumu u Briselu (2025), te brojnim međunarodnim webinarima i forumima iz oblasti javnih finansija, poreza i ekonomske politike.

Važno je napomenuti a što je vidljivo iz dostavljenog CV da je kandidatkinja je ostvarila kontinuiranu saradnju sa međunarodnim organizacijama i akademskim mrežama, uključujući gostujuća predavanja predstavnika Svjetska banka na predmetima iz međunarodnog finansijskog prava, kao i učešće u radu mreža i naučnih odbora međunarodnih konferencija (SEELS, CFMC, AI-SMART i dr.).

Zaključno, Komisija konstatuje da je kandidatkinja ostvarila kontinuirano i sadržajno učešće u međunarodnim konferencijama i studijskim boravcima, čime je značajno doprinijela procesu internacionalizacije akademske i naučnoistraživačke djelatnosti. Njeno prisustvo na relevantnim međunarodnim skupovima, kao i angažman u programima mobilnosti i stručnog usavršavanja u inostranstvu, ukazuju na otvorenost prema međunarodnoj saradnji, praćenje savremenih tokova u nauci i visokom obrazovanju, te aktivno uključivanje u međunarodnu akademsku zajednicu. Komisija posebno cijeni što ove aktivnosti nisu sporadične, već predstavljaju kontinuitet u njenom profesionalnom razvoju, sa vidljivim efektima na unapređenje nastavnog i naučnog rada, kao i na jačanje međunarodne vidljivosti institucije

Zaključno mišljenje i prijedlog Komisije

Na objavljeni konkurs za izbor nastavnika_ice u zvanje redovni profesor_ica na naučnu oblast Finansijsko pravo nauke prijavila se jedna kandidatkinja dr. Edina Sudžuka. Dr. Edina Sudžuka je zaposlena u zvanju vanredne profesorice na Univerzitetu u Sarajevu - Pravnom fakultetu na naučnoj oblasti finansijsko pravo. Imajući u vidu i sumirajući preliminarne nalaze po pojedinim tačkama Izvještaja Komisija jednoglasno zaključuje da kandidatkinja dr. Edina Sudžuka ispunjava uvjete za izbor u akademsko zvanje redovni profesor_ica na naučnoj oblasti finansijsko pravo budući da zadovoljava sve uslove predviđene čl. 96 Zakona o visokom obrazovanju Kantona Sarajevo („Službene novine Kantona Sarajevo“, broj: 33/17).

Polazeći od sveobuhvatne analize profesionalnog angažmana kandidatkinje, ostvarenih naučnih i nastavnih rezultata, kao i njene stručne i akademske referentnosti, te imajući u vidu prethodno iznesene ocjene i detaljnu procjenu ispunjenosti zakonskih i akademskih uvjeta za izbor u odgovarajuće zvanje, Komisija jednoglasno zaključuje da kandidatkinja dr. Edina

Sudžuka ispunjava sve propisane kriterije za izbor u zvanje redovne profesorice na naučnoj oblasti finansijsko pravo. U tom smislu, Vijeću Univerziteta u Sarajevu Pravnog fakulteta Komisija

p r e d l a ž e

da se vanredna profesorica dr. Edina Sudžuka izabere u zvanje redovne profesorice na naučnu oblast Finansijsko pravo.

Komisija :

1. prof. dr Kanita Imamović Čizmić, predsjednica Komisije,

4. Prof. dr. Nataša Žunić-Kovačević, članica Komisije,

5. Prof. dr. Aleksandra Maksimovska, članica Komisije,

Sarajevo 27. 04. 2026.